

四庫全書

集部

欽定四庫全書

明詩綜卷七十五

翰林院檢討朱彝尊編

張銓一首

銓字宇衡沁水人萬厯甲辰進士除保定推官擢浙江道御史巡按江西再按遼東陣亡贈大理寺卿加贈兵部尚書謚忠烈有集

宜春臺眺望

臺以宜春勝登臨恰仲春竹風如款客花氣欲薰人山
色平依檻江流曲抱城昔賢棲隱處覽古倍含情

張振德一首

振德字季修崑山人萬歷丙辰以選貢知興文
縣事天啓辛酉死奢崇明之難贈光祿卿謚烈
愍

魚兜堡

逝矣南荒地居然小有天魚兜沈夾浦龍洞閔靈泉耕

鑿番歌穩追呼羽檄連遠臣憂主辱未敢賦歸田

張可大一首

可大字觀甫其先孝感人世襲南京羽林左衛
千戶中萬厯辛丑武進士厯官都督同知轉右
都督改南京左軍都督府管府事鎮登萊崇禎
壬申吳橋兵變回攻登州城破自縊謚壯節

書邊事

無端小草出登壇壯士徒歌易水寒枉把全師輕一擲

遂令宿將盡三韓腐儒誤國由房琯野老吞聲恨賀蘭
豈是彼蒼開殺運祇因人事自摧殘

陸夢龍一首

夢龍字君啓紹興山陰人萬厯庚戌進士除刑
部主事厯員外郎中出為廣西提學僉事轉江
西參議湖廣副使貴州參政廣東按察使降補
河南參議轉山東副使調陝西以參政分守固
原道崇禎癸酉戰死贈太僕寺卿謚忠烈

宿東林寺

禪房獨樹鳥爭棲
月色冥濛霧漸迷
曉起不知山路滑
西風吹雨過前溪

孫承宗

六首

承宗字稚繩高陽人萬曆甲辰賜進士第二除
編修歷坊局以禮部右侍郎掌詹事府拜兵部
尚書兼東閣大學士奉命督師出鎮山海加太
子太保尋加少傅兼太子太傅文華殿大學士

再加少師兼太子太師予告回籍崇禎二年仍起督師又三年復予告歸七年高陽失守入城

南老營望闕拜叱持繯者縊死贈太傅諡文忠

有南陽集

魏環極云孫公古風近體靡不本英分據雄才高步作者之林而究無泥

於古

靜志居詩話先生自任天下之重盡瘁師中司馬之機方馳樂羊之篋已滿見危授命無媿全人集中三十五忠詩益有感於增禍而作三十忠者趙尚書南星高總憲攀龍周侍郎炳謨楊副院連馮副院從吉何總督士晉左僉院光斗李御史應昇夏御史之令周中丞起元繆宮

諭昌期蘇考功繼歐張尚書問達汪侍郎輝丁
檢討乾學鄧中丞漢袁御史化中吳總督用先
顧憲副大章王尚書紀魏給事大中鄒總憲元
標王侍郎之宋周主事順昌夏大選嘉遇周御
史宗建周同少朝瑞黃御史尊素劉知府鐸萬
郎中燦吳御史裕中張都事汶趙宗伯秉忠公
侍郎鼎孟叅軍淑孔也東林之君子已得十八
九馬先生之言曰起三十五人于九京未必人
人大有勛烈而有勛烈者必此
三十五人痛惜人才之至矣

山海關

甲冑詩篇少乾坤戎馬多幻仍看海市壯擬挽天河塞
上人先老山頭月奈何羣雄驕語日一劒幾經過

潮

休嫁弄潮兒潮今亦失信乘我油壁車去向錢塘問

送友人

山城吹角月婆娑一派秋聲向客多已是愁中聽不得
那堪重唱渭城歌

閒圃

閒身終日比雲閒不為秋風棲碧山却訝枝頭雙白鳥
夕陽飛倦未知還

秋日飲甯氏水亭

孤閣臨流混太清
烟波渺渺抱重城
西風莫卷枯荷盡
醉客重來聽雨聲

哭門人李元冶

海內交游已漸稀
眼前老友幾相依
夜來驚有西園信
淚灑東風滿客衣

呂維祺一首

維祺字介孺河南新安人萬曆癸丑進士除兗

州推官徵入為吏部主事歷員外郎中告歸崇
禎初薦起尚寶卿改太常少卿進本寺卿提督
四譯館升南京戶部右侍郎兼都察院右僉都
御史總督糧儲進兵部尚書流賊陷潁州都督
趙世臣守清流關兵潰廷議多咎之奪職辛巳
洛陽陷被執不屈罵賊死事聞贈太子少保尋
謚忠節贈太傅

南庚即事

往事如譚虎先憂甚喘牛自煩前席召屢切北宸憂令
甲漕難截呼庚例始留徙薪君不信毋乃到焦頭

劉振之二首

振之字而強慈谿人崇禎庚午舉人署東陽儒
學教諭遷鄆陵知縣辛巳十二月城陷不屈為
賊支解贈太僕寺卿有畫溪近草冰壺先生遺
稿

詩話先生初署廣文日以忠孝勉諸弟子題官
舍之署曰人熱難因吾鼎可愛又曰一片冰心

堪贈友滿腔熱血欲輸君
其後捐軀最烈不食其言

闕湖即事

秋容到處好碧水湛晴暉
嶺樹陰逾密湖雲濕不飛
亭虛山易入野曠鵲忘歸
戶外塵雖滿那能上芟衣

登青笑臺

樓陰倒映水潺潺簾卷空青鳥乍還
一幅雲林難著筆
半沈半露霧中山

汪喬年一首

喬年字歲星遂安人天啓壬戌進士除刑部主事累官兵部侍郎兼副都御史總督三邊死兵難贈兵部尚書

商於懷古

路入商源萬壑回據鞍懷古思悠哉茹芝高士墳猶在
徙木姦雄骨已灰計絕楚援游客詐詩題秦嶺逐臣哀
古今得失俱陳迹惟有山花歲歲開

蔡道憲二首

道憲字元白號江門晉江人崇禎丁丑進士除大理推官改長沙癸未八月城陷被執不屈為賊所磔事聞贈太僕少卿謚忠烈有悔後集

詩話江門自序悔後集云悔後者何前日妄作詩今而後悔也悔後而復有集者何吾但能焚前日之詩今日之作且輯之以竢後日之再悔也其虛懷可見詩雖音節未諧而清婉越俗如移竹已抽三尺筍種桃爭發一庭花又湘水清紫藤花落魚子生皆不失為佳句

送堵牧游入覲

十月迎君南千里送君北一歲雙酒卮隨君變顏色誰

能入長安便無故人憶下有洞庭上湘江為我留君不
可得我在南君在北夢相思見顏色他鄉飯君強食歌
再歌中歎息

歲暮

美人無信至歲暮江梅白家住嶺西東何處寄相憶

馮一第 一首

一第字根公長沙人天啓丁卯舉人崇禎癸未
長沙不守走湘鄉將乞師酉陽以圖殺賊為賊

所獲斷兩手置營中一夕死

野望

江岸閒行處晴雲澹一天微風生遠樹吹送渡頭船

蔡懋德一首

懋德字公虞崑山人萬厯己未進士除杭州推官入為禮部主事厯員外郎中升江西提學僉事轉浙江參政累官僉都御史巡撫山西太原城破自經于三立祠謚忠襄

月下步朱龍橋

長虹何夭矯獨跨萬山中一道來飛練千林壓冷楓歸
雲奔遠岫涌月洗寒空攬袂登高立憑欄望莫窮

金毓峒一首

毓峒字鶴沖保定人崇禎甲戌進士除中書舍
人擢湖廣道御史監宣大軍尋奉命督禁旅扼
畿南要害馳至保定登陴固守城陷投井死

早春雜詠

繫馬河濱及早春鳴鳩乳燕往來頻故園風景知何似
自愧東西南北人

范景文 三首

景文字夢章吳橋人萬曆癸丑進士授東昌推
官擢吏部主事歷員外郎中移疾歸起太常少
卿尋以僉都御史巡撫河南升兵部侍郎轉南
京都察院右都御史尋升南京兵部尚書坐劾
時相除名為民已復起工部尚書拜東閣大學

士京城陷拜闕號哭投井死初謚文貞順治初

定謚文忠有冰餐堂草

陳望士云范公詩古直豪邁稜稜露爽過國步

艱難故多

悽戾之辭

詩話啓禎之際秦聲變而至文天瑞楚調變而至尹宣子越吟變而至王季重正音掃地矣吳橋博綜舊章領袖羣雅其詩發揚而不厲新警而不佻獨自成家不飲狂泉之水

有感

天啓嗣祚年臺諫氣色盛憂危叫九閭所恃上神聖何
來連斥逐無乃累新政薄謫亦主恩敢廢天子命所虞

端一開庶言疑欲屏中璫思乘墉況可授以柄於惟我
神皇高拱握金鏡稍稍視下輕釀成結轡病今誰秉國
成借之弄機穽罪人佚顯罰反憾言官諍漆室抱深懷
能不心恟恟尚慎一怒加撫茲萬邦正

宿長清署中有感作

古驛昏鴉坐長塗病馬饑宵寒停柝早時亟啓關遲落
月三更信春風六日期年年行役苦兩度已於斯

過維揚

游子關情處江空白露秋客程初問水旅思怯登樓非
是瞻雲切還應見月愁鄉關歸夢裡一夜下揚州

倪元璐一首

元璐字玉汝號鴻寶上虞人天啓壬戌進士改庶吉士授編修歷侍講南京國子監司業右中允左諭德右庶子國子監祭酒升兵部右侍郎改戶部尚書兼禮部尚書翰林院學士京師陷自縊死初謚文正定謚文貞有憶草

詩話歷日之頌明太祖定於九月之朔其後改十一月朔繼又改十月朔遂為定制是日帝御殿比于大朝會士民拜于廷者例俱得賜倪尚書天啓中賦頌歷詩最為典重他詩過於新奇不然也尚書晚築室于紹興府城南隅牕檻法式皆手自繪畫巧匠見之束手既成始歎其精工時方患日疾取程君房方于魯所製墨塗壁默坐其中堂東飛閣三層扁曰衣雲凭闌則萬壑千巖皆在鳥下適石齋黃公至越施以錦帷張燈四照黃公不怡謂國步多艱吾輩不宜宴樂尚書笑曰會與公訣爾既北行遂殉寇難闕順治初尚存曩嘗攜舍弟千里暇輒登焉今已鞠為荒草矣

皇極門頌歷作

鳳闕開彤旭，猊爐散紫烟。
六階齊度緯，七政轉璣璿。
甲歷龍躔改，寅賓象魏懸。
明時功在革，資始義承乾。
黑帝威初試，青皇位早傳。
周官新月令，甘氏舊星篇。
人繼羲和後，書成堯莢前。
庚先三日戒，貞下一元旋。
圖錄符垂赤，干支德應玄。
興王惟省歲，太史又編年。
賜出黃星曜，披看綠字鮮。
因知天歷數，如日起虞淵。

孟兆祥一首

兆祥字允吉，交河人。天啓壬戌進士，除大理評。

事升吏部主事歷郎中謫行人司副尋遷光祿
寺丞轉少卿左通政太僕卿通政使官至刑部
右侍郎甲申三月守正陽門城陷不屈死贈尚
書初謚忠貞定謚忠端

詩話孟公峻節自樹取忤中璫卒殉節于正陽
門子章明顯之以進士觀政吏部視公殮畢亦
自盡時論翕然以為三百年特見之事初贈河
南道御史謚節愍順治九年定謚忠僖其詩文
惜無存

硤石

硤石分秦險郵亭日欲低未知山近遠已失路東西遠
水看烟起深林畏鳥啼鳳城何處是彌望草萋萋

凌義渠一首

義渠字駿甫烏程人天啓乙丑進士除行人選
授禮科給事中歷兵科都給事中升福建右參
政轉湖廣按察使山東右布政使入為大理寺
卿京師陷自經初謚忠清定謚忠介有使岷臺

詩話凌公詩義見者解頤嘗與閔文學元京共
排纂湘煙錄董上舍斯張稱其冷豔畢臚比之

吳均入東記及官禮垣封事四十餘上皆切中
時弊溫輔以吏才稱之轉外溫既謝政入為大
理臨難之頃從容就義惟悉取平生撰述焚之
為可惜也公清介特甚田廬一無所遺身後二
十餘年猶未升梓江都吳綺國次守吳興時夫
人閔尚存國次肅拜堂下秋深矣尚衣葛衣練
帶退而歎息恒以鹽豉魚菽遺之且
卜地葬公于驥邨之北為文祭之

鄴中詩

微風入樹冷修修漳水依然咽舊流何處高樓思落月
久傳疑冢有荒丘佳人南國經春鎖公子西園愛夜遊
最是英雄多慷慨當歌今日好銷憂

施邦曜 一首

邦曜字爾韜餘姚人萬厯己未進士武學教授
遷國子監博士歷工部主事員外郎中出知漳
州府升福建參政轉四川按察使福建右布政
使南京光祿寺卿擢左副都御史殉國難初謚
忠介定謚恭愍

詩話浙人不幸萬厯以來執政者前有四明後
有烏程德清以是朝士不附東林者槩目之曰
浙黨此指一時阿比執政者而言則可爾東林
諸君子全倚浙人助之人品益棺論定試觀建

文壬午崇禎甲申殺身成仁潔己自靖者惟浙
為多順治九年定謚甲申殉難文臣計二十人
而浙居其六繼此授命者更難悉數浙黨之目
庶幾可以一洒矣恭愍從容自經書其案云慙
無半策匡時難惟有孤忠報國
恩蓋初不以詩名而自饒方格

暮望

返照開西峽穿林度遠塘
卑枝散高影遠岫駐餘光
城市歸人急江天宿鳥忙
自傷遲暮客日日送殘陽

馬世奇 三首

世奇字君常無錫人崇禎辛未進士改庶吉士

授編修累遷左春坊左諭德兼翰林院侍講甲

申京師陷自經死初謚文忠定謚文肅有集

陳皇

士云公詩春容穠

麗居然唐人風格

詩話馬公清德奉使諸藩餽贈一無所受比還
朝夢中吟文信國詩從今別却江南日化作啼
鵲帶血歸蓋殉國之志
已素定故先兆于夢云

秦淮曲

萬騎南巡正德年內家前隊鐵連錢白衣舞罷乘鸞去
應有霓裳曲未傳

贈曹元宰守漳州

靈查秋泛海天涼五夜心懸燕寢香
總為至尊憂社稷
漢臣何必薄淮陽

贈鄭少府之任

宦薄無妨吏隱尊清風一拂百年存
流移滿目誰堪繪
念爾監門舊子孫

周鳳翔一首

鳳翔字儀伯紹興山陰人崇禎戊辰進士改庶

吉士授編修遷南京國子司業歷左春坊左諭
德兼翰林院侍讀都城陷自經死贈禮部右侍

郎初謚文節定謚文介有集

陳皇士云公詩清
灑無館閣穠重之

習

詩話甲申三月之變文介授命獨遲十九日城
陷語吳莊介云臣子義在必死然必一視大行
殯宮鵠素慟哭方可無憾爾二十一日赴東華
門茶棚下舉哀復匍匐至邸自經絕命詩云碧
血九原依聖主白頭二老哭忠魂時親猶具慶
也於時大學士宜城丘公瑜集議朝房俄而賊
入亟走民家自縊為旁人所持不死次日賊蹤
跡得之挾入窩舖求死不得賊帥劉宗敏刑辱

備加猶嫚罵不屈伺守者稍懈乃就縊論者責其濡忍至受羣盜之侮不得與忠臣之列文介東華之哭既不受賊帥之拘而萬舌一辭免腐儒吹疵之論是天所以成公大節而公之素行交孚于鄉國故也不其難哉

舟中聞鴈

一葦秋橫渡三江鴈引羣北來應幾日消息可相聞嘹唳孤雲迴蕭疎夜色分當前渾欲訴木葉落紛紛

劉理順一首

理順字湛六杞縣人崇禎甲戌賜進士第一授

修撰升左中允甲申殉國難初謚文正定謚文

烈有劉文烈公集

陳皇士云考宋元以來狀元及第死事者於宋得三人何

巢文天祥陳文龍於元得三人李黼泰不華李齊而明有五人靖難之時則有黃侍中觀土木之禍則有曹文忠公北京之變則有劉公而浙東有余庶子煌江右有劉中允同升先後皆死國事此亦科名人物之盛軼於前代者也

詩話劉公退朝賦騎猝入回寓舍書曰成仁取義孔孟所傳信公踐之吾何不然暨其妻妾並縊可謂不負科名矣詩多直抒胸臆不為體格所拘

錢塘江遇雨

微雨來江上濛濛曉未收故園千里隔客夢一身浮烏
柏家家樹魚榔岸岸舟觀濤無不可須上幾重樓

吳麟徵一首

麟徵字來皇號磊齋海鹽人天啓壬戌進士除
建昌府推官丁憂起補興化徵拜吏科給事中
歷都給事中升太常寺少卿京師陷自縊初謚
忠節定謚貞肅有集

詩話磊齋在八舍知無不言又明於當世之務
不如不吐素與執政齟齬不用其謀嘗與伯兄

石匏書云朝廷之是非臧否無恒而所號為正人專以門戶聲氣為事疆場事日益決裂安之若固然惟一人焦勞于上而已又云近日用人候更倏換當事全無確見惟覘上意所在其餘議論紛紜封疆事所以日壞良可歎也又云宜興敗後大獄頻興士大夫幾無生氣而言路更甚弟幸免風波然欲積誠以冀匡救之萬一則未可得也又云闕賊破潼關直抵西安秦督三萬師一潰無餘獻賊破長沙進逼袁州江浙震動吾鄉恐未能安枕天下事有不忍言者子姪輩教以敦厚毋事浮文為善於鄉黨足矣其言一一切中時弊臨終處置家事各有條理從容不亂尤人情之所難能詩不甚敦琢其工者每涉傷時存其二首吉人之言不在多也

送王昆華前輩使節歸省由楚入滇

益部占星信桐圭展萼親水滌湘畹碧山入點蒼新休
沐西南里詔訊遠近人潘輿聞送喜日望使車塵

李
子
德
云

全首
清穩

走筆招友人飲

玄亭今在否竹馬舊過尋尚憶人如玉那禁雪滿簪平
湖秋水濶板屋夜燈深莫更疎還往相看歲暮心

送葛無竒侍御按粵

刺桐花發粵山青一路爭看易繡經迴鴈峰南望天北

五雲長傍使臣星

汪偉一首

偉字叔度江寧籍休寧人崇禎戊辰進士除慈谿知縣選授翰林檢討甲申三月死國難贈詹事府詹事初謚文烈定謚文毅

旅次述懷

于役逢蕭序停鞍已夕春酒餘忘逆旅湖外憶高蹤挂壁留殘火披衣候曉鐘故園今漸近白岳有雲封

沈山子云

大歷十
子遺響

吳甘來 一首

甘來字節之瑞州新昌人崇禎戊辰進士授中
書舍人擢刑科給事中歷戶科都給事中甲申
死寇難初謚忠節定謚莊介

詩話思陵死社稷周文介欲哭殯宮而後死莊
介曰然其言而亟歸寓自縊時因哭殯宮而受
榜辱者蓋不止丘輔一人是則莊介之識遠也
甲申之變諫垣數十人或竄或辱或汙偽命死
節者僅莊介一人假踐文介之言安知不與丘
輔同其辱乎君子論吳周兩公之死則先時者

得其
正矣

經彭澤

亦有東籬菊何人尚隱居
夕陽催進艇殘夜擬焚魚
物變看多異名高謗未除
懷歸無長物猶有一牀書

許直一首

直字若魯如皋人崇禎甲戌進士除義烏知縣
以母喪歸補惠來選授吏部主事歷員外甲申
三月死國難贈太僕卿初謚忠節定謚忠愍

絕筆

投筆翻然辭世行老親幼子隔幽明丹心未雪生前恨
青簡空留身後名

王章 二首

章字漢臣武進人崇禎戊辰進士除諸暨知縣
調鄞縣徵授工部主事選陝西道御史以憂歸
服闋補河南道御史京城陷死之初謚忠烈定
謚節愍有公餘草

詩話王公赴義最烈公餘草詩一卷序者以吉
光一片喻之是年御史盡節者三人公與鄧陳
公良謨零陵陳公純德也聞有昆明趙誤字鎮
所天啓甲子舉人除貴州龍泉知縣以禦土寇
功行取擢四川道御史巡視中城城陷為賊所
械瞋目大罵賊刀仗齊下殺於白帽衙衙其死
與王公相類而遠方乙科無人為之請卹國典
野紀闕焉僅見於陳氏兩朝遺詩小傳特附書
之

聖駕閱城

秋色當樓滿崇閭奠帝居虎門橫雉堞鳳吹導龍輿峻
阪雲臨近封泉地絡舒翠華迴輦處嵩呼遍丹除

讀書篁川偶詠

竹裏起茶烟白雲堆滿屋何處桔槔聲園丁灌花木

成德一首

德字元修懷柔籍霍州人崇禎辛未進士榜姓
張有旨復姓除知滋陽縣事被逮杖謫久而赦
還補如皋知縣入為兵部主事轉員外郎甲申
殉國難贈大理寺卿初謚忠毅定謚介愍

詩話元修牽絲作令不善事上官為守所揭巡
按以貪酷聞被逮按臣及守溫輔私人也元修

母張具本聲寃於朝隨溫輔肩輿詬罵溫輔恚甚言於思陵杖之午門前下錦衣衛獄發遣時留家人居順義城破衆爭匿地窖中元修父文桂曰豈可男女雜入一窟中乎賊至遂遇害一妹二妾皆自經及甲申就義母張暨一妹一妾亦俱縊焉絕句一首蓋謫戍日太行道中作也

絕句

出山已定盟心語作令須思遣戍時但卷琴書賦歸去
莫因徇祿乞身遲

金

鉉

一首

鉉字伯玉留守前衛籍武進人崇禎戊辰進士

選揚州府學教授入為國子監博士升工部主事尋改兵部甲申殉國難初謚忠節定謚忠潔有集

詩話思陵之去閣黨無異拔山曾不數年命張
昇憲總理戶工二部錢糧出帑金別建公廨俾
諸司以屬吏之禮見金公再疏陳其不可謂以
陛下迪簡之臣而今其聲折偃倭於刑餘之子
不亦羞朝廷而辱當世之士耶思陵卒不允也
中官借驗火器劾公落職公笑曰吾去官遠此
輩如脫蟻蝨垢膩之衣豈不愉快遂與諸弟講
古文辭尤精研易理壬午七月晦讀邵氏書題
其後曰甲中之春定我進退進雖遇時外而弗
內退若苦衷遠而弗滯外止三時遠不卒歲優

哉游哉庶畢吾世又語其弟曰吾平生寡所好
視棄官如揮涕唾今以巡城每過御河輒留連
不能去何也卒沈於是從彭
咸之所居公志蓋已先定矣

拜文信國祠下

復始自天運臣道無終窮殉節士所恒寧足矜子功偉
哉一文士毅然任即戎棘行若履坦所在吟淒風一息
苟可奮安忍即瘖聾九死固所甘但惜炎運終堪嗟生
祭者不足語微衷

申佳胤 一首

佳胤字孔嘉永年人崇禎辛未進士除儀封知
縣擢吏部主事轉員外降南京國子監博士遷
大理寺副升太僕寺丞都城陷投井死初謚節
愍定謚端愍有君子亭集

詩話中公循史治最中州及考牧近畿聞寇逼
居庸郡縣望風奔潰或勸毋入都慷慨流涕曰
固知京師不支如天子孤立何疾馳以入時三
月十二日也徧謁大臣盡戰守策皆不省城陷
自投王恭殿井中其詩娟秀
不踰不浮近劉半舫一派

贈郭子

下榻留征騎燒燈共客吟萬金烽火信一夜故園心世事風塵老交情契闊深此行須鄭重兵氣滿山岑

王與脣 二首

與脣字永錫一字百斯濟南新城人崇禎戊辰進士改庶吉士授湖廣道御史巡視河東鹽課陝西茶馬應天學政引疾歸甲申四月聞京師

陷暨妻子登樓齊縊死有隴首集

陳伯璣云侍御以建言忤

執政蕭然歸里聞難之日不以在野緩須臾之死即其短嘆微吟已可知其嚴氣正性紀伯

紫云先生忠孝大節日月爭光詩

集僅存猶足挾風霜而鏗金石

詩話新城王氏科第最盛盡節死者亦最多崇禎五年吳橋兵變南趨時則保定同知象復暨其子舉人與夔死馬十五年城再破時則貢生與朋暨其子舉人王熊生員士雅死焉至是侍御暨妻于孺人子士和又死焉王氏之門才甲一世矣

對瓶梅作

鄉思那可禁
況復逢驛使
念我欲歸時
已結垂垂子

西羌雜詩

紇干山下少人過
大將行師按突何
袖裏尚餘三尺練

歸來生繫角斯囉

王士和一首

士和字允協御史與肩子新城儒學生

詩話允協死不違親與孟忠僖比烈其妻於崇禎壬午城破時先自經忠臣孝子烈婦萃於一門尤難得也

絕命詞

痛余生之不辰今天滅我之立王我父母一聞之兮涕滂沱以傍徨以身徇國難兮維千古之臣綱嗟反面而

事讎兮方臣妾之未遑哀世溷濁兮四維不張大地無
容身之隙兮願隨我父母歸于帝鄉

許琰一首

琰字玉重長洲縣學生贈五經博士

詩話玉重青衿未受一命無必死之義而忠憤
奮發始縊于家隨縊于福濟觀皆為人救解復
投胥門城壕時潞王舟泊城下遙望見之亟令
水夫掖起抵家聞哀詔至宛轉悲號賦詩有一
箇書生難殺賊願為厲鬼効微忠之句絕粒七
日而歿先玉重死者北京布衣贈中書舍人湯
文瓊聞帝崩煤山書衣帶云位非文丞相之位
心則文丞相之心慷慨自歎又聞金陵有丐者

聞北京變搏膺大哭赴百川橋下死謝康樂詩所云本自江海人忠義感君子是也

妾薄命

妾本名家子幼小受人憐感君明珠贈含笑意不前左手執書策右手揮鳴絃皎皎明月光苦憶嘗纏綿恩情恨不久韶華無盡年忍作待嫁衣甘為他人妍君故未相知妾意殊不然有聲當徹天有淚當徹泉待醒深閨裏風光寧久懸

王行儉 一首

行儉字質行宜興人崇禎丁丑進士授南京戶部主事歷郎中出知荊州府改重慶甲申六月死寇難

詩話張獻忠奪佛圖關用火具攻重慶時漢中已破瑞王來奔關南道陳繼及隴右士大夫挈家從之城既陷賊俘巡撫陳士奇知巴縣事王錫暨太守王公縛之演武場將殺之俄而雷電晦冥獻忠對天詬曰我殺人與天何涉架飛蛟向天齊擊之既霽諸公皆遇害事載婁東沈荀蔚蜀難紀略

軍中口號寄諸弟

重關烽火陣雲寒回首鄉園道路難
忽憶高堂清淚落還將尺素報平安

沈雲祚

一首

雲祚字予凌太倉人崇禎庚辰進士除華陽知縣甲申死寇難有侶郊居存橐

塗中悼亡

一水東歸百里津每逢風雨便傷神
而今帷帳辭秦淑誰憶江邊行路人

尹伸 三首

伸字子求宜賓人萬歷戊戌進士授承天推官
入為兵部主事歷員外郎中出知西安府致仕
起補陝西按察副使歷河南左布政使尋遷太
常卿張獻忠陷成都被執罵賊見殺

得黔報寄示兩子

仕宦通黔籍時比於放流頃者因戎馬反名才見收我
昨權出處曾慮當見投未即援奔林已同鷹在韝衰年

履瘴鄉病軀親戈矛中子不樂聞況使老妻憂惟予性
頗達死生同一漚炙額兼噴鼻壯夫昔所羞苟能了二
觀未必無一籌世法今頗解勉師老氏柔冠軍當辦戰
都護或深謀聲靈仗英主小醜何足劉虔勤奉簡書功
利不敢求畸人儻天幸為我營菟裘

叙南曲 二首

七星厯厯面煙鬟千佛巖頭翠岫班水合雙江波浪闊
浮來塏影是東山

鎖江北渡入涪溪亂石叢篁路欲迷太史遺文殘碣上
武侯荒廟夕陽西

孫士美一首

士美字公桀松江華亭人天啓辛酉舉人知深
州事崇禎戊寅十一月州城被圍力盡死于官
一門殉難者十有三人事聞贈太僕寺卿

守城作

鐵騎繞孤城烽煙勢未平君親本至性南北總關情地

下難熏鼠原頭絕救兵

一作此日魚書
急何時鶴唳清

寄言青史筆莫

載罪臣名

王佐聖 一首

佐聖字克仲一字魯生長洲人萬厯壬子舉人

除知遵義縣事崇禎壬午城破死于難有緘庵

詩鈔

詩話明季用人專拘資格吏部除目乙科多投
之遠方如張公季修王公克仲劉公而強馮公
根公殉節皆最烈豈惟千佛
名經中人始可入顯忠錄耶

幽蘭篇送黃子羽應召入京

芳蘭生空谷託根何孤清恥與羣卉伍修然挺素莖日
月沐秀華雨露滋芳英一朝辭中阿以之植蓬瀛風姿
益娟妙紉佩當瑤瓊允矣王者香不隨蕭艾榮

蘇瓊一首

瓊字赤友石埭人崇禎甲戌進士除知景州移
瀘州張獻忠寇蜀死于難有青城先生詩略

淮陰釣臺

駐馬淮陰道王孫劇可憐已無諸母漂猶剩一臺偏試
問藏弓日何如把釣年我來倍惆悵片石立寒煙

吳爾壘 四首

爾壘字介子崇德人崇禎癸未進士改庶吉士
李自成陷京師從賊中脫歸依史可法軍死揚
州之難有滋蘭堂初集聶許堂遺草

詩話先生間道潛行依史閣部軍中以身許國
遇鄉人祝孝廉淵南還斷一指裏家書中遺其
親誓不空返卒死于兵平居曾撰死臣傳目曰
仁書傳有小序各繫以古人曰湛身曰焚曰炮

烙曰炙曰自剄曰不食曰閉口曰雉經曰扼吭
曰立稿曰沒陣曰觸曰墜曰鵠曰烹曰菹醢曰
嚙曰斬曰車裂曰磔曰鋸曰囊撲曰剥曰剖曰
拉曰杖曰笞曰撻擊曰刺曰幽曰凍曰疽發背
曰慟哭統論之曰諸死者或假手于人或憤激
自裁或罵賊畢命身死主寤者有之身死敵懼
者有之身死家破者有之身死名榮者有之要
與禽息鳥視者遠矣其曰被犀甲操吳戈氣之
雄騰天河驚廣野捐愛戚志之決頭匪恤我心
赤我血碧長城雖壞白虹貫日則先生自道也
先生之死有故人殮其尸而寄棺于佛寺寺燬
於兵火棺亦燬焉其家函所寄指葬之四明葛
編修世振入之昭
忠錄并銘其墓

我行其野

三章

我行其野石田嶙峋荒原黯澹
不見人黃埃接天有狐僂僂
陰風吹車慮掣其輪


相彼征駒尚求果腹嗟我人斯
終朝無祿螟螣之生不遺荏
粟哀哉鴈戶載行載哭

我丁匪辰紛此百罹寇訐于郊
僉曰撫之惟恤人是咨俾大璫
是司我行其野告哀以詩

秋風辭

秋風颯颯兮切素肌華林摧謝
兮蛩蛩啼綺席陳兮清

歌闌美人去兮何當還羽蓋飛兮龍媒乘發激楚兮
韶鳴采三秀兮餐玉英思緜邈兮遐征歲華荏苒兮
時平



明詩綜卷七十五

欽定四庫全書

集部

明詩綜卷七十六

詳校官中書_臣涂日煥

主事銜_臣徐以坤覆勘

總校官降調編修_臣

倉聖脉

校對官庶吉士_臣

潘魯起

謄錄監生_臣

楊恪

欽定四庫全書

明詩綜卷七十六

翰林院檢討朱彝尊編

黃端伯

五首

端伯字元公建昌新城人崇禎戊辰進士除寧波推官改杭州歷禮部郎中南京既下死于市有瑤光閣集

靜志居詩話元公近體瀏亮雖注意逃禪都無蔬笋之氣絕命辭云欲識分身處刀山是道場

靈運可以

作佛矣

從軍行 二首

萬里長城北蕭條白草荒風沙吹不去秋色正茫茫日
冷行空壘天低壓戰場別來一回首何處是家鄉
遼落蕭關外陰風萬馬肥至今勞北顧何敢念東歸列
戍傳金柝寒沙卧鐵衣戰場春不到白雪作花飛

山陰道中

風昔流觴地回溪曲曲盤遙憐沙月迴漸覺海天寬暮

色橫烟暝春陰閣雨寒自耽泉石趣無夢到長安

建德道中

青天霜氣迴匹馬立平沙遠道風千里寒城月萬家亂
山盤徑險深樹引堤斜夙昔悲秋意偏於作客賒

夜泊龍湖登仙居閣

閣夜鳴風迅江天度月寒石林幽獨到沙路暝相看倒
樹斜懸壁驚濤急下灘長懷仙境勝便欲棄儒官

徐汧一首

汧字九一長洲人崇禎戊辰進士改庶吉士授
檢討歷贊善諭德庶子升少詹事家居投水死

三月十九日

珍饌精鏐賜講筵每逢令節主恩偏十章書未陳金鑑
九逝魂猶戀細旃社稷風雲誰奏曲園陵霜露已經年
龍髯回睇橋山遠玉匣珠襦不忍傳

顧咸建 一首

咸建字漢石崑山人崇禎癸未進士除錢塘知

縣死于官

詠落葉

杖策滄江思不禁
乍逢搖落一驚心
迎風野鳥當枝坐
泣雨寒蛩抱葉吟
掃徑空餘千樹曉
卷簾獨對萬峰陰
幽居一夜聽蕭瑟
片片隨流不到林

陸培一首

培字鯤庭仁和人
崇禎庚辰進士
除行人家居
死難

詩話大行風概自持卒蹈桐陽之節曩與陳公
朱明以文社不相能大行既就義陳公亦赴越
江以死曰吾生何面目見鯤庭
於地下今兩公並祀忠烈祠

絕命詩

誰謂朝廷一命輕行人使節本皇明春秋官叙諸侯上
周禮班從司馬名雍國尚慙收采石荆胥無計泣秦兵
蕩陰徒有滌衣血烈帝孤臣恨未平

祁彪佳 一首

彪佳字幼文紹興山陰人天啓壬戌進士除興

化府推官選授福建道御史巡按蘓松改南京
畿道以大理寺丞轉巡撫應天都御史謝病歸
乙酉閏月自投寓園池中死

詩話祁公美風采夫人商亦有令儀閨門唱隨
鄉黨有金童玉女之目其司理莆陽也應閩人
語近侏儻預遣人潛往買二麕婢詢其鄉音及
升廳事胥吏多操土語侮公公佯不知決旬後
按籍遍召在官人至一一聲其罪衆驚以為神
迨入為臺諫即進封事略云凡文武內外大小
諸臣必使之安其位而後各盡其心邇來六卿
九列之長詰責時聞引罪日見因而周章急遽
救過不遑竊恐當事諸臣悚於嚴旨冀以迎合
揣摩善保名位臣所慮於大臣者此也人材中

下參半藉上感發其忠義鼓舞以功名今司道
有司或欽崇之累由人或錢穀之輸未足降級
住俸什居二三必至苟且支吾急功赴名之心
不勝其掩罪匿瑕之念臣所慮於羣臣者此也
陛下聞鼓鼙而思將帥之臣僅得真英雄即推
轂設壇夫豈為過一或獎拔之術未盡則冒濫
之膏將萌臣所慮於武臣者此也陛下深懲情
竊特遣內臣撫按之事多令監視正恐同罪同
功反使互蒙互蔽開水火之端其惠顯啓交結
之漸其惠深臣所慮於內臣者此也其言切中
思陵時弊故其後亡國卒由此數端云公嘗治
別業於嵩山極林壑之勝乙酉閏月六日坐園
中題其案曰圖功為其難潔身為其易吾為其
易者聊存潔身志含笑入九泉浩然留天地又
書曰已治棺寄巖山戒珠寺可取以斂我是夜
兄子鴻孫侍側夜分不寐公第曰君子之愛人

也以德連鴻孫倦隱几步至放生碣下投水昧
旦猶整巾帶立水中子理孫班孫葬之園旁舍
池館為寺塑公像
于堂至今存焉

豐莊

為愛農家樂莊居築圃場秧鉞霑雨足稻子過風香北
郭依桑樹東皋接藕塘主人多種秫春酒足壺觴

劉宗周 二首

宗周字啓東紹興山陰人萬曆辛丑進士授行
人遷禮部主事歷光祿寺丞尚寶少卿太僕少

卿引疾歸尋補右通政削籍起順天府尹再引
疾歸起工部左侍郎以左都御史掌都察院事

乙酉六月不食死有戢山詩集

詩話先生家居恒服紫花布衣士大夫爭效之
布為長價吳江趙士諤知會稽縣事嘗問先生
疾造榻前出而歎曰豈意今日得覩管幼安萬
歷丁巳京察議及先生士諤時為考功郎爭曰
劉大行之清修人所不堪此士諤之所親見者
乃止吾鄉吳太常磊齋於天啓壬戌登第之前
夢一隱者誦文信國山河破碎風漂絮身世浮
沈兩打萍之句問其姓名曰劉宗周也太常不
省時念臺先生以儀曹郎知貢舉相見驚訝其
後交契靡間甲申之變太常死之逾年先生里

居絕粒旬有四日而終遺詩云信國不可為偷
生豈能久予嘗造先生廬堂不過十笏京兆干
旌尚存思陵曾賜勅云蔬食菜羹三月不知肉
味敝車羸馬廿年猶是書生先生當之信可無
作

出通州用友人韻

策蹇何所之遭時亦云厄一步一回首四郊營壘迫大
道宜如矢青天萬古闢從此遂已而身後令人惜

酬別長安故人

弱柳千章鎖鳳樓春風送客不勝愁杜門重憶十年病

束髮誰先天下憂銷鑠壯心吾自老
傍徨歧路子何求却教空谷傳驪唱
落日浮雲滿帝州

溫璜一首

璜初名以介字于石烏程人崇禎癸未進士除
徽州府推官乙酉六月死于官有貞石堂集

詩話溫公少孤母陸孺人鞠之破屋一間無帷
帳姑沈病且死同坐卧一板箱種火煨粥以為
食教其子讀書姑卒孺人哀毀如子天啓七年
公請于有司聞于朝詔旌其節孝又一十八年
而公成進士年六十矣司李徽州聞國難恒引
佩刀嘆曰此身當付汝及城破先殺其女寶德

次殺妻茅妻女皆延頸就死乃自刎公初名以
介注名復社第一集不以兄在相位見擯于清
流後禱夢於于忠肅祠夢忠肅語之云子不當
名以介宜更曰璜遂更焉陸孺人著有家訓行
世於

寄友

靈隱峰前手暫攜千章新綠子規啼眼邊流水春重到
別後停雲思幾迷俯聽露珠傳點畫驚聞藥裏急刀圭
殷勤簡付遺方法茹澹安緣緩杖藜

左懋第一首

懋第字仲及萊陽人崇禎辛未進士除澄城知縣選授戶科給事中歷刑禮兵三科升太常少卿巡撫都御史以兵部右侍郎兼都御史督師河北充通問使不屈誅

詩話左公將北行貽書姜給事塚大略謂國遭大故二東不聞有斷頭穴胸以報故君者彼鄒魯仁義之稱安在懋第此行是懋第死日也既入燕卒以閏月十九日死于市新城王尚書士禎池北偶談云公母徐海寧儒家女甲申京城陷從子懋泰載以歸行至白溝河仰天歎曰嗚呼此張叔夜絕吭處也呼懋泰前責以不能死國且曰吾婦人身受國恩不能草間偷活寄語

懋第勉之勿以我為念言訖而死蓋出都
不食已數日矣是母是子前史亦不多見

道上

歸鴻昨夜過紅葉見秋深念我籬邊菊思君石上琴舍
車眺水色倚樹聽風音舊業荒東海悠悠此際心

徐石麒

十五首

石麒字寶摩青浦籍嘉興人天啓壬戌進士除
工部主事削籍崇禎初起補南禮部尋改吏部
升南尚寶卿應天府丞歷吏部尚書有可經堂

集

詩話冢宰歸田之日築堂于郡榜曰可經人不
解其故及乙酉城被圍公度必不能守步自東
門入城破自經于堂始信公之就義立志已久
蓋與昔賢止水之意脗合焉公古今詩俱新警
不作規撫蹈襲之語鍾嶸詩品
以落花依草喻丘遲公實似之

贈同鄉朱六符

予本同園蒿飄在天一端咫尺粉與梓邈若霄漢間翔
鳥憩前林猛虎戀故山傷茲遠遊客中夜積悲歎忽遇
故鄉友驚喜相盤桓把臂問舊事耆舊半摧殘憂根長

愁條淚下如奔湍樽酒非不肯安能起沈歡幸君到故園為我傳平安

憩古墓作

郊游無名山荒丘且踏屣古木既叢叢豐草亦靡靡隔葉隱幽禽清音啼不已石馬被文韉翁仲夾而侍不能驅牛羊朝暮齧其址此中陳死人井榭安足恃所以楊王孫裸身無乃是

送錢車駕左遷歸里

依依鍾山雲坦坦石城道驅車出龍關送我昔所好舟
子且停橈聽我歌草草巧仕有別材置身青雲表夫子
天下士紉佩祇蘭藻忽失上官意飛章注下考粲粲當
塗子片言由意造散宜策獻姝季路曾請禱柰何堅弗
應深文任顛倒平生久要者棄置迹如埽豈曰無蹇修
洵美非吾寶長嘯歸去來形容豈枯槁君家錫山下門
徑鬱蘿蔭雲乳發冽泉雪花散香稻潔白養高堂此樂
詎可討臨別重躊躇申言豁懷抱

謝劉太史湛陸惠詩

予曾過大梁臨風懷伊摯秉耒耕莘疇遽抱唐虞志一
民不時雍內溝發深思此道久已陳夫子願躬試文行
動至尊頭龍親簡置既窮太乙竒復發鴻寶祕早晚宜
相麻天下乃得治麒也此竊人所受盈其器承乏白雲
省爰書失聖意投荒分所宜而況僅播棄譬如累碁者
累高勢自墜烽火滿近郊逐臣正遷次感君懷芍藥題
扇以相遺奄然蓬蒿人儼若佩華璫此情何可酬此念

何可真頓令松柏心白首欲自刺

臨鏡

攬鏡照病顏不知鏡裏誰似鬼有微息似人無雙頤似
容貌何似是我何其羸展轉不能視掩鏡還自悲頭顱
今如此百年寧所期安仁三十二玄鬢已成絲而況三
十三於潘更長之江南多早衰昔人已如茲假令彭與
錢臨歿等殤兒夭壽何足異尻輪惟所宜昔人有明訓
樂天復奚疑

苦寒行在句曲道上

天寒敝絮僵如鐵，車輪乍轉車聲咽。
歷過千山萬山雲，時飄三點五點雪。
皮膚蜩縮毛髮張，蹇驢蹄滑愁道長。
暮烟一點青句曲，鞭梢遙指此中宿。

明月行懷王大基生

今年月是去年月，去年人作今年別。
去年對月兩相將，今年對月腸斷絕。
腸斷絕兮起傍徨，中宵重露如凝霜。
綠錢盈階時草芳，縈予懷兮不能忘。
丈夫骯髒寧有淚。

已覺簌簌沾衣裳歲如馳今不我與望美人今天一方
仰天歌今夜將旦明月黯黯今沈垂楊

曉發新州

江抱新州碧沙仍舊日黃難期晴雨色莫辨水雲光逆
旅便風俗征人漸老蒼平生我任達久矣破行藏

次團江

下馬團風澣烏林舊戰場楚弓沙月白吳壘成雲黃鑑
影涵天遠襟流束地長江聲疑有恨如欲訴興亡

黃州晚泊

赤壁雲初暝
烏林日漸紅
波搖兩岸火
人語隔江風
夢鶴梢天路
然犀逼水宮
天寒游子意
清夜月明中

望匡廬

突兀此何處
匡君廬亘天
黛浮五老壁
青入九江船
慧遠林中寺
康王谷口泉
苻生今已老
誰與買山錢

過安慶

百戰舒州地
英雄久寂寥
潯陽懸暮色
滄海落歸潮
楚

竹然魚子汀蘆宿鴈寮金陵行且近不斷瑞烟飄

池口有懷

黃鶴池邊鶴金雞石上雞乘雲千載去落月幾回啼不
見仙人蹟空傳過客題蕭條暮江上腸斷楚天低

次蕪湖

倚櫂鳩茲邑山光雜水氛估檣蟠郭遠市語隔江聞烟
氣凝為霧歌風散入雲古來佳麗地無日不紛紛

夜發靜海抵直沽

禾黍高低弄夕曛
檣燈零亂破黃昏
樹蒸夜氣三分雨
帆裏秋烟一葉雲
靜海金鉦鳴古戍
直沽牙閫駐新軍
援遼已竭東南力
何日辰韓報策勲

張翊一首

翊字叔韓秀水縣學生城破整巾襴南向正席
坐兵以刃臨之罵不已遂遇害

鶴夢

百禽正嘈雜此鶴獨孤眠
奮翮豈無俟藏神亦偶然
庭

中人寂寂松下月娟娟知入寥天去緱山何處邊

項嘉謨一首

嘉謨字向彤一字君禹秀水人有讀選堂詞賦

集

譚梁生云向彤阮仲容謝幼輿一流詩篇都雅簡勝

詩話向彤投筆遠游渡河出塞尋入閩登武夷
曹能始錄其詩入十二代詩選乙酉閏六月城
破東平生所著詩賦于懷投天星湖死子翼妾
張從馬向彤墨林之孫賦性儻蕩不羈中歲產
落歲辛巳年飢糧絕從父以五斗米貽之妾張
為執爨知向彤不甘澹泊以二升米易乾魚進
飯向彤怒曰乾魚豈可下箸耶復以米三升易
爨雞乃飯予家與向彤鄰竈婦述之以為笑謂

是席屐子弟栗果少年
而視死如歸可敬也已

晚次薌溪

人家遠見女牆頭客到城邊盡繫舟
薄暮寒蟬聲未歇
心隨楊柳送殘秋

錢應金

三首

應金字而介一字仙上嘉興縣學生城破走村
居游兵掠郊野見其髮未開剃遂見殺有古處

堂集

詩話而介雅以詩詞
名而今存者無幾

岷閣贈周幼文

謾謾山上松磊磊澗中石託根非不深所貴在貞白白
華志養親陟岷怨行役懷古徒悠悠瞻母時脈脈綺疏
闌南楹抗言恣墳索曲鉞不受磁腐草不受珀冰霜歲
云晏至理在琴冊

沈甫受蝶花居秋色詩

沈郎八詠世爭誇草色庭中不讓花秋氣逼人清入夢

夢騎蝴蝶到君家

邗溝

烟荒月淡古邗溝
淮水遙連江水流
六代繁華餘腐草
至今螢火照揚州

侯峒曾 二首

峒曾字豫瞻蘇州嘉定人
天啓乙丑進士除南
兵部主事調吏部歷郎中
出為江西提學副使
轉廣東右參政調嘉湖道
升順天府丞歷左通

政使乙酉秋縣城破赴水死

詩話萊陽宋公繼登備兵嘉湖夜有白猿竊其衣冠服之搥鼓升廳事時海寧袁秀才株留公幕中猿入臥室披其帷秀才大懼公命隸卒環守而猿之往來如故也予童子日偕諸昆弟行精嚴寺街人爭聚觀謂猿方坐鐘樓啖果子審視獨未之觀其後納言至止猿乃潛蹤又常熟時敏知海寧縣事夜草爰書有女子侍側磨墨問從何來曰鬼也敏既擢給事中代之者候官林塗鬼自是不復至侯公林令俱忠臣以此知邪不勝正理有然者

晚行餘杭山中

解鞍一散步羣峰亂將夕浮嵐羃遙青喬柯拂深碧須

史落霞散銀紫紛狼籍尋蹊得絕澗驚濤互歆射有如
翠蛟舞飛下三千尺一步一回顧已覺耳目易此景宜
急追一失難再獲

送表弟楊維斗解元上公車

赴隴徵書有曠思仍偕計吏謁金門時危漸覺科名薄
道在還知禮樂尊老子甲兵今孰仗嗣宗臧否不輕論
冰霜歲晚孤征夜襜被應知手綫溫

侯玄演 二首

玄演字幾道通政峒曾子

雜詩

道喪向千載百家日浸淫如彼鎗磬歇
逐響遺其音元宰何微茫悠悠費追尋
世皆尚彫飾未敢明此心微言會將絕
太息空撫襟

和新柳詞

秦淮雪凇緩春晴十里烟隄綠未明
早是酒旗歌板地隔江風浪卷蕪城

侯玄潔 二首

玄潔字雲俱亦通政峒曾子

癸未九日寓崑山

肺病經三月秋深寄古祠近山寒更早多雨菊翻遲漸
減文章樂能忘寇盜悲今朝無客至令節有誰知

示智舍

天王十五年來事孤客三千里外人望闕尚留年少哭
哀時偏見異鄉春坐愁南郡征輸日行過江黃戰伐塵

直北大荒空草木春風生事又黃巾

黃淳耀 十二首

淳耀初名金耀字蘊生蘇州嘉定人崇禎癸未進士乙酉家居城破自縊有陶菴詩集

詩話陶菴精於書義融會九經諸史審擇而出之當崇禎之季方以駢麗相尚不知者以為陳言子叔父芾園先生獨賞心擊節盡以其豪授予讀之久之而漸有稱焉者如雅頌得所樂有堂上堂下之分又孔子未嘗刪詩伯鯨未嘗誅死皆至當之論乃邇來選家以其未盡合乎朱子之集注章句痛加塗抹是何異於下士之聞道乎詩亦堅厚無懦響由不惑於楚人之咻然

也

和陶飲酒

朝光入山樓樓烏已驚喧攬裘暴新陽暖氣無頗偏仰
視天宇清得我檐前山山中出岫雲變滅何時還我心
正惆悵默與風鈴言

和癸卯歲始春

舊穀滿場圃知子良非貧糟牀注春醪酬汝四體勤開
軒一笑粲莫適為主入薜牙花乳香鱸縷銀絲新咄嗟

行酒炙童僕皆欣欣中原有格鬪行子勞問津不能濟
時代甘與農圃鄰逝辭謝景夷來就劉遺民

和乙巳歲三月

西崦有佳花首春烟霧積良游阻塵鞅耿耿懷在昔野
寺流晨鐘雲林矯風翮湖山光皎鏡千里如不隔之子
天機深平吟謝形役一持金石韻如與清賞易幽悰方
曄况復暫離析寄言山中人參取庭前柏

和歸田園居

家無環堵宮所至思買山何異俟河清人壽期千年安
得如古人采山復臨淵敬受十賚文賚以北阪田巖棲
高百層老屋餘三間湖江流東西竹木榮後前中央置
講堂文史浩如烟歌風復蹈雅樂志忘華顛此意恐蹉
跎飛光去閒閒畫餅不可食詎諧聊復然

和擬古 三首

亭亭采桑女清光映城隅羅衣出纖手皎若春蕙舒芳
風何飄飗薄暮歸重廬行子皆歎息願言與之俱空簾

隔星漢白露委靡蕪淵意不可道蹇修定何如

步上姑胥臺悲風來大荒古墳何焦嶢下有黃金堂寶
衣化寒灰月露浩茫茫前朝割據時復作繁華場侯王
及廝役聚斂歸北邙感此拔劍舞青山為低昂秉燭方
視夜歛忽明東方我非好名人亦起羊公傷

弱年見承平自謂長如茲一從更事來世已非前時雕
虎橫井陘黃流混澠淄杖劍出門去行行復狐疑路逢
季主儔問彼龜策辭龜策不我告龜勉自研思仁義心

所安皇天吾不欺
瀉水置平地東西任
所之撫琴操猗
蘭亂之以俛詩

野人二首

野人嘆息年歲惡
池中掘井井底涸
飛蝗引子來蔽天
辛苦將身事田作
朝廷加派時時有
哭訴官司但搖手
歸逢吏胥狹路邊
軟裘快馬行索錢

野人嘆息朝無人
朝中朋黨如魚鱗
十官召對九官默
篋中腰下皆黃銀
不知何人理陰陽
頻年日食四海荒

我欲上書詆朝士又恐人呼妄男子

虞山喫虎肉作

猛虎入山山氣惡腥風倒射巖石落兩三村
不識虎謂是旄牛未生角扼虎之吭擘虎尾
虎驚不及施牙觜東海無煩赤刀制南山已
報白額死老夫羈旅春盤空短衣匹馬行山
中坐分羹臠飽欲死拔劍四顧吾何功邛
邛邛莫倉卒儒冠為爾頻衝髮人間真有猛
於虎勸爾拔身辭虎窟

次韻酬別張子石

百丈牽江一線平，勞君客裏念歸程。
即看去住誰能料，可是分離莫漫輕。
白鳥背飛星子驛，朱旗遙颭石頭城。
船牕日把詩篇坐，香草含風處處生。

張貞白有離世之志，作別廬舍詩見示，予反其意留之。

瓜廬小結在塘坳，城市翛然即遠郊。
谷為愚公寧避辱，亭因揚子不辭嘲。
鳴蜩秋盡猶緣砌，舞燕春深亦認巢。

莫愛雲松棲絕壁山中依舊要誅茅

龔用圓 一首

用圓字智淵蘄州嘉定人天啓辛酉舉人嘉興

儒學教諭

侯雍瞻云先生司鐸嘉禾先伯兄方應備兵之命俾攝郡司馬事寇盜屏

息迨聞南都不守挂冠歸里城破兄弟赴水家人入城蹤跡之於大柳樹下有二尸相抱持其一肘間懷印則先生兄弟也邈哉先生千古為烈矣
顧端木云 嚳城既破龔博士智淵與兄用廣弟用厚猶子元韶元朋元增及閨閣殉節者五人先生苦心學殖篇章頗富惜散佚不傳

湖上遇同年朱子暇

一見相攜話舊遊
湖光汎汎斷橋頭
寒烟迷却西泠路
還向當壚問酒樓

馬元調 一首

元調字巽父上海儒學生僑居嘉定人稱簡堂先生

從師遊棲霞寺

吾昔遊棲霞同人催北渡未識山中僧
那辨山下路巖澗迷東西欲記恒恐誤
先生理舊遊小子愜所慕

黃毓祺 二首

毓祺字介子江陰學生有大愚老人遺集

畫竹引贈朱白民

長風從天來吹我魂
飛飛飛飛上謁天帝
扉天帝問我何所欲
不願為人願為竹
帝笑黃生無乃太癡
竹有何好而爾願之
我不願截為竿大魚
小魚慘不歡我不願
截為杖化龍君山之
湖上我不願截為簫
鳳兮鳳兮不
可招我亦不願娥皇
女英哀哀攀我泣重
瞳馭遙叫不

得朱白民朱白民願伊為我一寫真貌我形似兼精神
所以願為竹不願復為人

不寐憶元兄南行

暗風吹雨夜蕭森布被繩牀冷不禁老別匪徒三日惡
淡交奚止十年深案頭飢鼠縱橫出階下寒蛩斷續吟
遙憶孤舟蘆荻岸有誰同我此時心

夏允彛 二首

允彛字彛仲號瑗公嘉善籍松江華亭人崇禎

丁丑進士除長樂知縣以吏部行取補考功主事旋歸里乙酉南京下自投池水死

詩話幾社六子瑗公以經義見長詩非專尚然其撰長樂志境有孝子節婦必賦詩以旌之集中樂府未嘗不合古人也野史述瑗公授命在乙酉五月第集有練川五哀詩按練川城潰乃是年七月五日瑗公尚存則止水之投當是松江失守之日爾

襄陽踏銅鞮

辛苦襄陽女織縑還織素縑成身上衣素作風帆布

黃進士淳耀哀詩

黃子不偶生大雅寡諧俗羽儀乍高翥結綬匪所欲黃
雲暗蒼梧北風號大陸烽火滿吳關下邑勢彌蹙緬彼
二三子登陴自躑躅城郢既已平號秦又誰告處死良
獨難苟生何能淑吁嗟烈士心伯仲互相勗威鳳既在
羅恥與凡禽逐未知沒者悲但見存者辱存沒兩茫茫
思君不可贖

睦明永 一首

明永字嵩年丹陽人崇禎壬午舉人選授華亭

儒學教諭乙酉八月三日松江城破自經不死
投泮水被執不屈見殺有世經堂橐

臨江觀古意

即今懷
闕樓

煬帝飛樓屈紫霄檻拍長江接海潮三千殿脚南巡汴
百萬舟師東下遼晉陽戈甲從天起仁壽宮中泉作醴
檻外楊花依舊飛千里桑田隔江水

顧咸受 一首

咸受字幼疏崑山人天啓甲子舉人縣城破死

于難

落葉

天半淒清鴈字斜
箇人無賴小牕紗
三分秋色三分雨
半似霜容半似花
忽送離愁迷曲徑
暗隨幽夢度平沙
無情最是堪腸斷
不為蕭條惜物華

梁于涖 一首

于涖字飲光江都人
崇禎癸未進士除萬安知縣陣沒

竹西亭

茱萸灣水渙渙上有孤亭峙高岸而今冷落荒烟斷遊
人不來蒼鼠竄問竹西人不辨惟有隴上舊耕夫五十
年前說曾見

麻三衡二首

三衡字孟璿宣城人選貢生屯師姑山兵潰被
執死于市

詩話孟璿注名復社遜賦無衣陳安未克生還
狼睥已得死所詩如落日照荒野亡猿懷故林

魂銷分劍日心折覆巢時草閣新寒入江邨落
雁多一身去鄉土雙淚滿滄洲吳兒望歲唯呼
雨楚客憂生盡憶家夢回塞北雙流淚家在淮
南獨倚樓萬山茅屋白雲滿十里句溪紅葉飛
殊自起
趙朗朗

贈錢聖月

不寐成搔首蕭然獨寤歌霜天砧響急庭樹雨聲多酒
力三更緩愁心萬緒過錢郎戀明主獻賦意如何

春興

三月新雨歇春流始到門叢筠連晝暝新燕掠波翻山

靜鹿無跡林香風滿園中原多轉戰幾處欲招魂

沈壽堯 一首

壽堯字景山宣城縣學生死于難

即事

幽棲如久客日暮起啼鳥橘實寒猶在梅花凍欲無聞
鐘山寺遠聽雪夜燈孤賴有牀頭酒長吟可不沽

王養正 一首

養正字聖功泗州人崇禎戊辰進士除海鹽知

縣以憂歸補秀水謫河南按察司簡較升襄陽
推官入為刑部主事歷員外郎出知南康府遷
江西按察副使建昌既下繫至武昌遇害有漫
吟等集

對菊

仙人授錦囊中有百年草本是駐顏丹人間不知寶

胡甲桂 一首

甲桂字秋卿崑山人崇禎己卯副榜除南昌通

判遷永州同知以道梗未赴改廣信城破被執
不屈幽之別所自經死

夜泊常山

淙淙灘響上舟遲到面山容未即移更喜月明迎短櫂
吳吟細聽隔船詞

祝淵二首

淵字開美海寧人崇禎癸酉舉人有月隱先生

遺藁

詩話崇禎壬午先生伏闕申救劉公宗周時未
識劉公也及公罷歸始著錄稱弟子附舟南還
已而緹騎逮入詔獄施施逼京師有詔赦出比城
陷太常卿吳公麟徵殉之先生視含殮護其喪
歸塗遇吳吉士爾壘斷一指寄其家先生為攜
歸留都既下先生葬其母尋自經死會劉公絕
粒公弟子王毓著自投柳橋下遺書于公謂慎
無為王炎午所笑師弟之死蓋不出三旬也

西湖月夜 二首

落月鱗鱗水面浮
露華濃滴桂叢秋
不知何處鳴柔櫓
驚起一雙雪色鷗

佛火漁燈漸寂寥
推蓬起坐已中宵
夜來極浦灘聲急

知入西泠第幾橋

李待問一首

待問字存我松江華亭人崇禎癸未進士乙酉
八月保松江城中流矢死

卧子招飲卧龍山蓬萊閣

故人留牘少酒坐亦從容俯視湖一曲不知花幾重澄
煙天鏡水哀壑禹陵松身在蓬萊閣千巖第一峰

明詩綜卷七十六

欽定四庫全書

明詩綜卷七十七

翰林院檢討朱彝尊編

黃道周 一首

道周字幼玄一字螭若漳州鎮海衛人天啓壬戌進士改庶吉士授編修歷中允以言事鐫級俄落職尋起官以諭德掌司經局再遷少詹事協理府事與經筵講隨謫江西布政司都事逮

至京廷杖下詔獄遣戍福藩稱制進禮部尚書
南京既下猶督師出發源師潰執繫故尚膳監
不屈丙戌二月死於市有大滌函書浩然咏

靜志居詩話詞臣無言責居无咎无譽之地需
次待遷而已迨石齋先生入翰苑與上虞同年
倪文貞公俱自任天下之重崇正去邪盡忠補
過引裾折檻九死不回先生詩所云親從霹靂
推車過又得滂沱自在春蓋實錄也及退而講
學於杭則大滌洞天於閩則蓬萊峽少長咸集
遐邇具來監史主賓琴瑟鐘磬庶幾濂洛之遺
風焉先生璣象之學辭義深奧後生或昧其指
歸詩才亦未免踳駁要其光皎不啻萬丈也曲
周路皓月過銅山弔先生詩云道德公自重文

章公自深若夫軍旅事似非公所
任用違其才此百世所惋惜者

西湖忠烈祠迎送神曲

雷鼓闐兮龍在野雲離披兮龍血下龍上天兮星無光
椒楮媮兮蘭不芳靈之集兮四國鴻八蹄兮麟九翼凌
滄海兮拍白日蹌徂征兮何不得息歸休兮此堂水周
兮中央寒雞殖兮菖蒲羅百珍兮瓊漿驂素虬兮駢文
鸞柅靈車兮繫靈馬執靈祛兮淚盈把珮琚兮灑灑晝
不足兮宜宵夜維舟兮鏤筵新夫君兮王正年靈參差

今無後先澹眉鬚兮馭青天靈何為兮中惓惓

路振飛一首

振飛字見白曲周人天啓乙丑進士除涇陽知
縣選授四川道御史累官漕運總督右副都御
史後入閩自縊于邵武山寺

除夕

仗劍以從戎自憐轉自喟黔驢欲噬虎病馬思追驥匡
濟術渺然進退兩無致漂泊海舟中面目亦堪恚天心

或垂憫俾全名與義寸衷百慮嬰竟夕不成寐雞鳴又

一年歲月悲空棄

譚梁生云柘國酬知之日乃作此垂首喪氣之語足見不昧心人

彭期生一首

期生字觀民海鹽人萬厯丙辰進士厯官江西

按察副使分巡湖西守贛州城亡自縊有弱水

山人詩集

詩話先生與楊萬諸公力保孤城死之日守備
楊大器潛收其尸瘞于萬安縣之百家村仲子
孫貽訪其遺骸未得久之鄉人胡樞知萬安縣
事一夕夢先生語曰遺骸在縣境君能歸之故

鄉幸甚會大器之友曾堯景亦以狀白樞樞資
遣之至海鹽家人詰其事皆合子女旋以血漬
遺骨俱沁入乃慟哭葬之
說者比於思歸之溫序焉

送秋

悲秋秋去轉堪悲枉復登臨賦楚辭遠壑水殘斜照斂
荒原煙冷朔風吹天邊白鴈迷消息月下清砧感別離
蟋蟀似能占物候寂寥一夜傍牀帷

姚奇肩 二首

奇肩字有僕錢塘人中崇禎庚辰會試癸未進

士除南海知縣後死贛州之難有草玄堂詩集

秋夜

遙夜苦無寐起視明月光涼風天上来隨月入我堂披
衣步前除獨立以徬徨蟋蟀既已鳴鴻鴈亦来翔感此
時物變怨彼去日長生非金石姿安得恒壽康憂来不
可輟慷慨吟此章

遊虎丘

高丘窈窕恣幽探席展諸天坐蔚藍聽徹疎鐘歸櫂動

半塘漁火泊城南

劉同升

二首

同升字孝則吉水人祭酒應秋子崇禎丁丑賜
進士第一人授修撰謫按察司知事尋復官守

贛州死

詩話劉公與楊萬諸公固守贛州或云城未
陷先病卒或云城破死之傳聞異辭再考

由百花溪登玉笥山

朝看山出雲暮看雲入笥山行若無蹊恰有青童至指

點絕壁間仙臺藏勝地藤枝匪易攀屐齒猶可置日午
聞雞鳴巖椒啓金字出險坡漸平劃然人境異連峰涌
下界撲面聳層翠因過丹竈房縱覽紫微志白花雨外
明紅果林間墜晚食供芋魁晨鐺倒茶櫃坐久慵下山
踟躕想真寄塵網詎得辭幽期偶然遂

句曲山中

地肺通幽處泉流決決聞山形同一已仙籍注三君衣
潤恒燒术人來欲贈雲青童煩指點十賚拓遺文

楊廷麟 八首

廷麟字伯祥清江人崇禎辛未進士選庶吉士
授編修改職方主事軍前贊畫降調起補編修
死贛州有兼山集

詩話伯祥慨忼淋漓特
取材未純故辭多鬱轉

懷楊進士

青青東門阪上有藤蘿結願得一心人白首無磷涅周
才慎所處不敢居明哲開戶見性情羣動齊巧拙翔鳥

安其巢離獸營彼六萬物各為友吾生何所悅名山豈
易求耦耕效長桀

諸葛武侯祠

霸氣西南日嘗聞屢出師才為王者佐學與古人期柏
剩一孤樹桑移八百枝中原仍帝魏遺恨史臣辭

示城兒

歸舟今日遠西望獨沾巾骨肉天涯濶山川枕席親誦
詩思有汝好學或如人以此發深省鄉書不厭頻

別葉侍御

渾水橋邊寺北田行滕東去雨連鯨桑邨古渡沙移岸
茅屋人家鳥就烟江左衣冠悲楚澤淮西烽火接秦川
更聞羣盜郊原遍欲下潯陽萬里船

秋興

四首

北湖菱葉近漁家烟浦荒荒鴈路斜濕鳥立沙聞社鼓
野人當戶飼田瓜月明露上蒲萄蔓夜靜風生荻蕩花
悵望故園溪外渡一聲橫篴冷蒹葭

司戶祠前一騎回邊烽未舉嫚書來漢臣獨有和戎策
楚子誰稱執政才半壁但愁軍餉乏三關不覩陣雲開
最憐風雪盧龍塞換取牙門酒一杯

彊弩將軍七萬營銀鞍金甲耀東征市兒果銳輕言戰
上相安危慎用兵海鳥自啼狼虎嶺妖星空照鳳凰城
河西百里無消息又道青山夜火明

漢家歲歲戍居延新築渾河北斗邊文學未諳鹽鐵論
公卿誰進度支錢高城寒聽菰蒲雨戰骨秋枯首蓓田

壯士不聞還易水至今賓客淚潛然

萬元吉 一首

元吉字吉人南昌人天啓乙丑進士授潮州推官補歸德再改永州入為大理評事遷兵部主事出知揚州府歷太僕寺卿監軍江北死贛州

游月巖謁周元公廟

中歲不聞道汎汎逐萍梗緬懷先哲型沈憂不出頰茲
來矚巖月鬼斧鑿天影尺竇洩素雲一星射瑤井物理

竟何如遐蹤忽深省元公昔幽憩萬慮悉以屏陰陽動
靜初澄心得妙領於焉瞻遺廟百世尚嚴整冥心無極
前衣露遍清冷

梁朝鐘

二首

朝鐘字未央廣州順德人崇禎己卯舉人有喻

園集

題畫兼寄友人

灞陵山色動秋風開遍黃花九月中每憶江南帶霜樹

夕陽疎葉渡頭紅

陳子壯

二首

子壯字集生南海人萬厯己未賜進士第三授
編修天啓末削籍崇禎初以原官起用厯諭德
詹事升禮部右侍郎進尚書家居殉難有雲淙
集

耕籍禮成恭紀

天子親行畝微臣相秩宗清塵傳蹕靜瑞靄出郊濃高

柳喧靈鵲華芝結袞龍普天應有兆九穀在三農

春日侍諸父泛舟桃花塢

欲作郊居即瀼西紅芳十里勝金堤不知南漢千年苑
更入東風幾曲溪負局客來籬犬吠和歌誰伴乳鶯啼
清時羣從多游好豈是秦人世外迷

陳邦彥 三首

邦彥字會斌廣州順德人貢生以兵保清遠師
潰死于難有巖野集

詩話巖野僻居嶺南與黎美周歐子建陳喬生以文章聲氣遙應復社卒殺身以成仁其南上草自序云商聲曼歌慨當以慷亦各言其志也又臨命歌云書生漫談兵時哉不我與君子誦其詩而悲之

南雄道中逢霍階生

病後無顏色秋深有遠行漸於鄉土隔翻遣故人驚歸思珠江道前途白下城嶺梅殊未發貽贈若為情


重別葉公士

大雅風斯遠知音世所稀他山情獨切兩地夢俱飛楚

塞丹楓暗吳門翠岫微祇憑文賦在萬里未相違

雨夜宿吳潮泗江閣

去家五百里相過重鄉音客路樽前語江流檻外風
連三峽暗雲隱二禺深莫作登樓賦柴扉尚可尋



明詩綜卷七十七